

# MANIFIESTU: “ASTURIES PELA IZQUIERDA”

*Lo que tienen que se preguntar los asturianos ye, simplemente, si hai razones abondes pa sobrevivir como autonomía, esto ye, como colectividá o llegó la hora de la dimisión histórica. Nel primer casu han d'enfotase, cuanto primero, na recuperación del so protagonismu comunitariu nel concierto de los pueblos.* (Pedro de Silva, 1976)

Asturies avanza de forma non querida y poco consciente camín d'una desconexón dafechu col sieglu XXI. **Una desconexón física**, productu de la nuestra xeografía, pero tamién caltenida nel retrasu y la paralización d'infraestructures indispensables dende'l puntu de vista internu y esternu. **Una desconexón económica**, pola caducidá, más o menos inmediata, d'una parte curiosa de les estructures productives basaes na economía d'industria pesada-extractiva y enerxética. **Una desconexón tamién social y demográfica**, con una pirámide poblacional avieyada, agravada pola emigración d'un porcentaxe importante de la xeneración nacida nos años 80 y 90. **Una desconexón territorial interna**, alimentada por un vieyu localismu que nun dexó aprovechar les sinerxes qu'una bona coordinación del territoriu fadría posible. Y **una desconexón xeneracional** na que medró l'escepticismu y el desenfotu ente la mocedá que ve qu'equí'l so futuru llaboral y el so proyectu de vida son inciertos y albidra que la emigración ye una opción inevitable.

Esta desconexón respunde a causes estremaes anque rellacionaes. La entrada d'España na CEE supunxo l'entamu del esmantelamientu del modelu productivu asturianu, esi modelu blanco-negro-gris (lleche-carbón-metal) que pilotó'l desendolque de la nuestra tierra per más d'un sieglu, ensin una alternativa pa sustituyilu por otu. Los distintos gobiernos asturianos, más qu'exercer como talos, portáronse como simples diputaciones provinciales que lo fiaron too al usu de los fondos europeos, en munches ocasiones marafundiaos n'obres faraóniques de dulcosa utilidá, en cuenta d'apostar pola actividá productiva, creyendo nuna hipotética inversión exterior que nunca llegó. A lo llargo d'años, esos fondos valieron d'anestesia social que, al empar que dexaba texer una rede clientelar pa construyir mayoríes electorales, amazcaraba la decadencia del nuestu sistema productivu.

Pero al empar, Asturias foi empobinando la so aición política, non exenta de contradicciones, frutu de les lluches históriques protagonizaes pol so movimientu obreru nel últimu sieglu y mediu que definieron la so conciencia colectiva, sobre la base de los principios y los valores de democracia, igualdá y xusticia social. **La universalidá y calidá de les sos redes sanitaria y educativa**, que dan unos servicios que, por más qu'amenorgaos como resultancia de los años de cortes, siguen siendo referencia nel conxuntu del Estáu. **La defensa de la calidá y la estabilidá del emplegu y los derechos llaborales**, tanto nel sector públicu como nel priváu. **La solidaridá como exa de l'aición político-institucional**, que foi concretándose na inclusión y la equidá social como prioridá política. Toos son principios y valores defendíos históricamente pola izquierda política y sindical, que fixeron posible algamar unos razonables niveles de desendolque y bienestar que la derecha económica y política punxo nun grave riesgu nos postreros años. Asturias foi tamién una sociedá abierta, na que la inmigración de trabayadores foranos non solo nun foi nunca un problema, sino al contrario, una parte integrada que siempre sumó pa trabayar polos derechos de tola comunidá.

Pero'l caltenimientu d'estes polítiques públiques basaes nos principios y valores históricos de la izquierda va ser inviable si Asturias nun llogra tornar el procesu de desconexón. Dicho d' otra miente, namái vamos poder caltener y ameyorar el conxuntu de los nuestros servicios públicos y avanzar escontra un modelu institucional basáu na xusticia y la igualdá, si somos pa peracabar de forma inmediata les infraestructures pendientes, valtar el tradicional y absurdu localismu, y

construyir un modelu políticu-institucional nel que prime l'interés xeneral y la complementariedá territorial, abordando con rigor la cuestión demográfica y, sobre manera, si somos quien a diseñar y entamar un nuevu modelu productivu que garantice la caltenibilidad económica y l'emplegu nel nostru país.

Pero a pesar de les dificultaes vamos ser quien pa llograr esi oxetivu. Pa ello **Asturies habrá refundase na década viniente**, terminando cola actitú psicopolítica de sumisión y sucursalismu qu'Asturies bien teniendo pa col Estáu dende va décadas y que reproduz comportamientos de protectoráu d'un suxetu colonizáu feliz. Vencer esa actitú nun quier dicir, de nengún mou, renunciar a la construcción d'un futuru común y solidariu con tolos pueblos del Estáu. Caltener una esixencia con España que garantice inversiones públiques y planificación económica xusta, y contribuyir a avanzar escontra un modelu de república federal moderna, democrática y con un claru carácter solidariu, participativu y social. **Vencer esa actitú significa ser quien pa rearticular un proyectu políticu solvente** na nuestra tierra pa que, como señalaba va cuasi cuarenta años Pedro de Silva, recuperemos como colectividá la dignidá de ser axentes de nós mesmos. Trátase, entós, de recuperar l'Asturies productiva y consciente de sigo mesma.

**Eso quier dicir que nestos próximos diez años tenemos de ser quien pa diseñar un modelu económicu** que combine les industries tradicionales, (siderúrxiques, metalmecániques, químiques, alimentaries, etc.) cola industria del sieglu XXI basada na información, la tecnoloxía y la innovación, superando'l modelu de los sieglos XIX y XX.

**Significa tamién que nos próximos diez años tenemos de multiplicar el presupuestu de la Universidá d'Uviéu y el destináu a investigación y desendokque** pa que se conviertan n'elementos esenciales, en locomotores de l'adaptación continua. **Superar esto esixe que na década viniente l'Área Central seya una realidá** institucional y territorial integrada, ensin qu'eso signifique, baxo nengún conceptu, siguir cola eterna marxinación de les ales. **Quier dicir tamién que de manera urxente tean operatives les grandes infraestructures de comunicación**, incluyendo'l corredor del suroccidente, el corredor Atlánticu –exa estratéxica d'intercambiu económicu, comercial y cultural con Europa– y les redes de telecomunicaciones que nos conecten col sieglu XXI y relocalicen les redes de producción y consumu, convirtiendo a la nuestra tierra n'exemplu pa un contestu económicu internacional en crisis insuperable. Superar el protectoráu ye, en definitiva, **establecer de manera inmediata la oficialidá de la llingua asturiana** nel nostru Estatutu d'Autonomía pa que'l tratamientu del nostru idioma nun s'estreme del que se da a les demás llingües del Estáu.

En definitiva, Asturias habrá refundase dende la certeza de que ye a construyir una dinámica social y económica nueva que dexa abordar el futuru. Tenemos de partir de les nuestres insuficiencias pa superales, y tenemos que ser conscientes de les nuestres fortaleces y de los nuestroos grandes recursos. Entamando pel territoriu, un cuarenta por cientu que ye nominalmente reserva natural, ún de los mayores espacios protexíos d'Europa, lo qu'ufierta enormes posibilidaes pa la industria ambiental y el turismu sostenible y que dexa, n'espacios urbanos, periurbanos y rurales, que la nuestra comunidá seya un llugar inmeyorable pa vivir y trabayar. Una Universidá y un conxuntu d'organismos d'investigación y centros tecnolóxicos que, con una estratexa afayadiza y un financiamientu suficiente, podían convertise nel cerebru y motor de la nuestra economía. Una tradición industrial qu'afite les bases del nuevu modelu de producción. Un mediu rural que, magar que necesitáu d'adaptación y modernización, puede siguir sofutando una industria agroalimentaria qu'en munchos aspectos ye cimera n'España. Un patrimoniu históricu y cultural, tanto material como inmaterial infrautilizao, necesitao de protección, pero, sobre manera, de reconocencia y d'actualización que lo dignifique, non como restos del pasáu sinón como ferramienta de futuru. Y la so xente. Asturias cuenta sobre manera cola so xente, nuevo y vieyo, trabayador de tou tipu, comprometío cola tierra y el futuru.

Asturies tien que se refundar, pa que'l proyectu que la reconecte col mundu caltenga los valores y les conquistes sociales que nos llenen d'arguyu; pa que la democracia, la igualdá y la xusticia seyan los principios qu'empobinen la so acción política, esa refundación tien que la encabezar la izquierda, que tien de caltener tolo que pague la pena caltenese, que ye muncho más de lo que proclamen los voceros neolliberales y nun tener mieu a refugar lo que'l tiempu señaló como inservible. Riquimos un gran pautu pol futuru de la nuestra tierra ensin renegar del so pasáu, participando na redefinición global de la izquierda, pero asumiendo la esperiencia colectiva de la llucha social del nostru pueblu.

L'ación política de la izquierda nun pue ser únicamente, nin siquiera principalmente, la de resistir sinón la de proponer. Poro, les muyeres y los homes d'Izquierda Unida y d'Izquierda Asturiana queremos dar un pasu alantre y comprometenos a encabezar un compromisu cola nuestra tierra dende una izquierda con identidá propia. Eso quier dicir atopar dende equí les respuestes acionaes reformulando les preguntes, pa trabayar ensin tarrecer los desafíos d'esti tiempu nuevu, pa qu'Asturies caltenga la so conciencia colectiva y transite pela izquierda. Queremos convocate al proyectu de llograr ente toes y toos l'Asturies que suañamos. Pa que, nes décadas vinientes, podíamos seguir diciendo con arguyu que "pa descubrir llugares que plasmen non siempre hai que mirar a les estrelles".

